


Duri Vigeli Cavegn *03.02.1918 - 06.06.1998



- Naschius ils 3 da fevrer 1918
- Frequentau las scolas primaras a Rueras
- Las realas a Camischolas
- In temps egl jester sco fumegl da purs
- Returnaus a Rueras e fatg il pur
- Morts ils 6 da zercladur da quest onn.

Aschia vesa la cronica d'ina persuna da nies miez ora. Cefras ed in per lingias. El ei vegnius ed ius. Ed en in per onns, tgi sa schebein enzatgi seregorda aunc dad el?

Denton tgi che ha enconuschiu il Duri Vigeli pli datier sa che denter quellas lingias schai l'istoria d'in um ch'ei

seprendius en per la cuminonza, che ha luvrau, in pur cun tgierp ed olma; in pur incarnau.

Il Duri Vigeli naschius a Rueras igl unviern 1918 ils 3 da fevrer. Ei era il temps dalla emprema uiara mundiala e la greva grippa en Svizra haveva rappau beinenqual giuvna veta, era cheu en nossa val. Tgei panzieris e tgei patratgs pon ils geniturs da Duri Vigeli giu haver fatg en quei mument da naschientscha. El ei naschius sco secund affon da Duri Vigeli Cavegn e Marta naschida Monn da Sedrun. Il num ha el artau d'in aug che steva en casa dadens, e ch'ei morts gest quei onn. Nov fargliuns ein aunc suandai el. Siu bab il Duri Vigeli vegl, era in um marcant, emprem cantadur en baselgia e pur atras atras. In um serius che pretendeva dils ses e da sesez engaschi. La lescha benedictina; ura e lavura, Dieus tei gida lura, fuva per el bunamein in condament de Diu. Aschia ha la lavur mai muncau, al Duri buca ed era buca pli tard a ses fargliuns. Els havevan in grond puresser per gliez temps, las lavurs vegnevan exequidas tuttas a maun.

Quei ch'ils «Durivigelis» havevan era cavagl, dil temps che tut haveva aunc bov denter ils stadals. In maletg co il bab dil Duri pretendeva dils ses da lu-

vrar e co el veseva il temps niev dat l'anecdota ch'ins rauenta sur dad el: In marcadont vulevi vender ad el ina maschina da segar. Mo il Duri Vigeli havevi scurlau il tgau e detg: «Nein, meine Buben sind meine Maschinen.» El necrolog da siu bab (GR 2-4-65) san ins leger denter auter ch'el schevi: «Jeu semischeidel buca en fatgs dils auters, mo en mia famiglia sun jeu in retg, in retg tschentaus da Diu». Enqual ga ston ins mirar anavos per saver capir meglier il concarstgaun.

Suenter las scolas dalla val ei il Duri staus el cantun Zug tier in pur pli grond per rimnar enqual experienza sur dil puresser. El havess era fatg bugen la scola dil puresser e las qualitads havess el era giu, mo la gronda tratga a Rueras ha pretendiu dad el da returnar e far leu il pur. Cun tutta curascha e grond anim ha el fatg il pur ensemen cun entgins da ses fargliuns. Ils ins ein maridai e setratgs naven e restai ein sias soras la Barla e l'Onna Maria che han gidau, luvrau e barhau sco ei han saviu e pudiu ensemen cun el. La Barla ei stada muort malsogna entgin temps a Sedrun en casa s. Vigeli e morta 1992. Restai ein els dus; l'Onna Maria ed il Duri. Els han fatg il pur tochen che las forzas e sanadad han sfurzau da calar, da vender ni da schar via igl entir fatg. El ha fatg vess da schar ira usits, ison-

zas e stuiu dar si reglas ch'eran stai onns ed onns ora in muossavia dil puresser. Mo la truscha ed il catsch dil temps dad oz ha mess tut sur las risteinas e fatg far il pass aunc pli gronds che quei ch'il pli era. Buca mo schliet ha il niev purtau, mo als purs ch'eran tratgs si da nos vegls eis ei stau grev da suandar.

En cumissiuns, el cant, sco capitani tier la cumpignia da mats, ina scharscha tschercada da gliez temps, e tier outras incaricas ha el mess a disposizion sias forzas per nossa cuminanza.

Suenter ver dau giu tut eis el era selegraus da saver prender empau pli lev e schar ruassar siu tgierp. Denton era la sanadad buca la pli buna e fatg passar el aunc pli schit. La bein meritada sera dalla veta ha el denton era saviu guider. Ina paterlada cun vischins, ina viseta cheu e leu, leger bia, dar in scart troccas la dumengia, ni prender e far ina spassegiada. Ad el er'e mai lunfurus.

In di ei la curella ida atras il vitg ch'il Duri seigi el spital. Tut anetg e tut quiet e paucs dis suenter ha il clom dil zenn annunziau sia mort. Grondas caneras ha el mai giu fatg ed aschia senza caneras eis el ius.

Car Duri, ruaussa en pasch e sin seveser.